




Senin, 19 Oktober 2020

Ogen: 1 Tesalonika 4:13-18



Pengarapen si Pegeluhken



Tupung reh Presiden Jokowi ku Taneh Karo erkiteken lit erupsi deleng Sinabung, enterem kal masyarakat si ersura-sura ngalo-ngalosa. Arah pihak pemerintah enggo iaturken protocol si man ikuten, rikut rambu-rambu pe enggo ipasang. Bagem adi sekalak pimpinen Negara reh ku daerah, kerina arus ipersiapkan mulai bas lalulintas ras keamanenna, persiapen pengalo-ngalo, ingan, alat pengeras suara ras sidebanna. Adi banci ula kal min lit si murde, gelah tuhu-tuhu metunggung pemimpin e.

Tupung Tuhan Jesus pemimpin surga ras doni reh mulihken ku doni enda, kai si man persikapenta? Perlu tangkas man banta maka Tuhan Jesus e ugapa pe reh, sabap e enggo ipadanken Dibata. Tuhu sada pe kita labo metehsa ndigan ia reh tapi pasti IA reh. I bas ay. 16 ituriken, lit pagi sora erlebuh, sora malaikat si mbelin, ras sora terompet Dibata, janah nusur me Tuhan i Surga nari. Kalak si enggo mate pe pagi ipegeluh mulihi gelah banci nggeluh rasa lalap ras Tuhan. Si e ngatakensa maka Jesus pasti reh mulihken. La sada pe lit si tading guna ngalo-ngalo IA, kalak si mate pe pagi ipegeluh mulihi. Situhuna man kalak Kristen em si jadi ulu pengarapen. Jadi aminna gundari kita nggeluh denga, la lit kebiaren ras kearun ateta amin gia pagin kita mate sabap e kentsik ngenca bandingkan ras kegeluhen si rasa lalap e. Man kalak Kristen kematen e labo pendungi kegeluhen, tapi sada langkah awal guna masuk ku bas kegeluhen si rasa lalap. Nggeluh ras Jesus rasa lalap, si igambarken i je eme ketenenggen, kedamen, dem kemalemen ate, kuh kerina si mehuli. Janah si enda kerina isikapken Tuhan Jesus man kalak si tetap i bas kiniteken seh matena. Pedah pendungi bas renungenta, emaka siapul-apulenh kam alu kata enda, gelah ula celus i bas kiniteken, janah tetap kita ersikap ngalo-ngalo kerehen Tuhan Jesus.